



**La pretensiun da l'incarica da la deputada Claudia Troncana cunterfa a la lescha federala e nun è applitgabla, scriva la regenza en ina resposta sin ina ulteriura dumonda da la deputada.**

FOTO R. CANAL

## Betg realisabel

Il chantun na po betg surrender il ristg per ils emprests dal fond per il svilup regional

■ (anr/ac) **La pretensiun da limitar la garanzia communal per la mesadad vers emprests dal fond per il svilup regional cuntrafà a la lescha federala davart la politica regionala e nun è realisabla. Uschia s'exprima la regenza grischuna vers ina dumonda da la deputada Claudia Troncana (pld, Engiadina'Ota).** Per la fin da l'onn 2017 existan 13 emprests da daners dal fond per la politica regionala da la confederaziun a favur da telefericas grischunas en la summa 13,4 milliuns francs. Ina summa dad emprest cun garanzia communal. La deputada *Claudia Troncana* e cun ella ina maioritad dal cussegl grond han incaricà

la regenza grischuna da limitar la garanzia communal per quels emprests sin la mesadad a disfavur dal chantun Grischun. Na va betg, scriva la regenza grischuna en ina resposta sin ina ulteriura dumonda en chausa inoltrada da la deputada Troncana, ina dumonda inoltrada en il cussegl grond il favrer passà. La regenza fa attent ch'ils emprests derivian cumplainamain da la confederaziun. Bain saja il chantun medemamain involvè en la finanziaziun dals projects sustegnids dal fond per la politica regionala, dentant cun contribuziuns a fonds perdu. Las vischnancas garanteschian per emprests da la confederaziun ed ina midada

sistemica cuntrafetschia a la lescha federala davart la politica regionala e na vegnia betg acceptada da la confederaziun, scriva la regenza. Per almain pudair ademplir ina part da l'incumbensa Troncana da l'october 2016 vul la regenza adattar las directivas da promoziun dal departament d'economia e fatgs socials, scriva la regenza en la resposta a la dumonda Troncana dal favrer 2018. Quella adattaziun duai pussibilitar dad acceptar er ulteriuras segirtads sper la garanzia communal. La ristga da perdita dals emprests tar las telefericas valitescha la regenza per auta ed ina midada da la garanzia limiteschia l'autezza dals emprests futurs.